

Peqqussutissatut siunnersuummut oqaaseqaatit

Oqaaseqaatit nalinginnaasut

1. Aallaqqaasiut

Peqqussutissatut siunnersuutikkut Naalakkersuisut akoorutissat qaartuujasut pillugit suliaasaqarfimmi pissutsit pingaaruteqarnerit pillugit maleruagassiornissamut piginnaatinneqarput, taamatullu siunnersuut pineqaatissiissutaasinnaasut ataatsimut isigalugit sakkortunerulersinneqarnerinik imaqarluni. Tamatuma saniatigut pisut ilaanni siumoortumik eqqartuussisumit aalajangiiffiunngitsumik misissuiartorluni pulaarnissamut kiisalu soorlu akoorutissanik qaartuujasunik eqqussinissamut akuersissuteqarnikkut kisermaassinissamik nalunaaruteqarnissamut tungavissiisoqarpoq.

Inatsimmut maanna atuuttumut naleqqiullugu Naalakkersuisut suliaasaqarfiup iluani maleruagassiornissamut piginnaatinneqarnerat annertusingaatsiarneqarpoq. Taamatut Naalakkersuisunut piginnaatitsissutip annertusingeqarneranut tungaviuvoq inatsisip sapinngisamik eqaatsuutinnissaa, taamaalilluni Kalaallit Nunaanni ajortumeeriniarnernik allatigulluunniit isumannaallisaanermut ulorianartorsiortitsisoqartillugu piffissap sivikitsuinnaap ingerlanerani unitsitsisoqarsinnaassalluni pitsaaliuisoqarsinnaassalluniluunniit.

Tamatuma saniatigut Naalakkersuisut maleruagassanik ataatsimoortunik imminnullu atasunik pilersitsinissamut piginnaatinneqassapput, inuit ulluinnarni akoorutissanik qaartuujasunik avatangiiseqartut nalinginnaasumik isumannaallisaavigineqarnerat qaffasinnerulersinnaalluni.

Pineqaatissiinissamik periarfissat sukannernerulernerisigut eqqartuussiviit maanna Kalaallit Nunaanni pinerluttulerinermut inatsimmi pineqaatissiissutaasinnaasunik tamaginnik pineqaatissiisinnaaneri periarfissinneqarpoq, taamatullu akuersissutit akuersinerillu nalunaarutigineqareersut utertinneqarsinnaanerat pillugu Naalakkersuisut allaffissornikkut maleruagassiorsinnaalerlutik. Kingulliullugu taaneqartoq annertuumik pitsaaliuissutaasussatut naliliiffigineqarpoq. Allanguut aammalu pineqaatissiinissamik aalajangersakkamik sukannernerulersitsineq niuerfimmi suliaqartunut annertuumik oqariartuuteqarput; akoorutissat qaartuujasut ataqqinnittumik peqqissaartumillu suliarineqartassapput.

Kalaallit Nunaanni pinerluttulerinermut inatsit naapertorlugu pineqaatissiisarnermut tungatillugu tamatumunnga tungavissaq peqqussutissap oqaasertaliorneranut ilanngunneqarpoq, Naalakkersuisut maleruagassiaanni aalajangersakkanut, pinerluffinnut tungasunik imaqartunut tamanut atuuttussanngorlugu. Aalajangersakkalli pineqaatissiisinnaanermut tungasut sulii Naalakkersuisut

maleruagassiarisimasaannut ilaatinneqartariaqarput. Aalajangersakkap oqaasertaliorneratigut qulakkeerneqarpoq aammattaaq inatsisitigut pisinnaatitaasut pisussaatitaasullu, Namminersornerullutik Oqartussat, kommunit imaluunniit kommunit suleqatigiiffiisa pineqaatissiisinaanermut aalajangersakkami pineqartunut ilanngunneqarnissaat.

Inatsisartut peqqussutaanni piginnaatitsinermut aalajangersakkat annikillisinneqanngimmata, akerlianilli annertusineqarlutik, maleruagassat najoqqutassallu aalajangersakkat allanngortinneqartut naapertorlugit suliassimasut atuutiinnassapput.

2. Peqqussutissatut siunnersuummi immikkoortut pingaarnarit

Siunnersuummi eqqarsaatigineqartuni pingaarnerni siulleq tassaavoq nunarsuarmi inuiaqatigiit ajortumeerinianut eqqumaffiginninnerisa annertusinera. Tamanna ukiut kingulliit iluanni alianartorpassuarnik, akoorutissanik qaartuujasunik atuiffiungaatsiartunik pisoqartarnerata kinguneraa.

Akoorutissat qaartuujasut Kalaallit Nunaanniit Danmarkimut immaqalu tassanngaanniit Europap sinneranut imaluunniit silarsuup sinneranut ingerlateqqinneqartannginnissaat aalaja-ngiisuulluinnarpoq. Suliassaqarfimmut pineqartumut inatsimmi atuuttumi itisiliinissaq amigaatigineqarpoq, taamaalillunilu Kalaallit Nunaat akuersarneqarsinnaanngitsumik inissinneqarluni.

Taamaalilluni siunnersuutip kingunerisaanik suliassaqarfimmi inatsit nunani Kalaallit Nunaata imminut assersuuttagaani suliassaqarfimmi inatsisinut nallersuunneqarsinnaalissaaq.

Eqqarsaatigineqartuni pingaarnarit aapparaat ataatsimut isigalugu innuttaasunut isumannaallisaanerup qaffanneqarnissaa. Nunatsinni ineriartorneq pitsaasoq, illoqarfiit arlaqartut pitsaasumik alliartornerannik kinguneqartoq pissutaalluni sanaartorfiusut suli annertusiartorput. Tamatuma kingunerisaanik qaartartuusiviit pioreersut eqqarsaatigineqanngitsumik inuinnarnut inissianullu najugaannut aarlerinartumik qallingaatsiarsimapput, ajutoornerlu kingunerluuteqangaatsiarsinnaalluni.

Siunnersuutip nassatarisaanik Naalakkersuisut ilaatigut eqqussinissamut, akuersissutinik nalunaaruteqarnermut kiisalu toqqortaqaarnermut maleruagassiuussinerisa annertusineqarnera aqqutigalugu ajutoornerit annerit pisinnaanerannut ulorianartorsiorneq annikillisinneqarsinnaavoq.

Siunnersuutip nassatarisaanik Naalakkersuisut akoorutissanik qaartuujasunik eqqussinissamut, annissinissamut, toqqortaqaarnissamut, tuniniaanissamut, pisinissamut, tunniussinissamut, assartuinissamut, atuinissamut sananissamullu, kiisalu suliffeqarfiit akoorutissanik qaartuujasunik toqqortaqaarfiusut, atuiffiusut sanaffiusartullu aqqissuunneqarnissaannut maleruagassiorsinnaanissamut piginnaatinneqarput. Naalakkersuisut Inatsisartut peqqussutaanni matumani piginnaatitsineq naapertorlugu maleruagassiaat nalunaarutitut ilusilerlugit aalajangersarneqassapput.

Kiisalu Naalackersuisut ataatsimut amerlanerusunulluunniit akoorutissanik qaartuujasunik eqquassinissamut, annissinissamut, toqqortaqaarnissamut, tuniniaanissamut, tunniussinissamut, assartuinissamut, atuinissamut sananissamulluunniit kisermaassinissamik akuersissuteqaarnikkut nalunaaruteqarsinnaapput.

Tamatuma saniatigut pisut ilaanni siumoortumik eqqartuussisumit aalajangiiffiunngitsumik misissuiartorluni pulaarnissamut tunngavissamik ikkussisoqarpoq, taannalu misissuinermi siunertat pingaernerit, tassalu uppersaatissanik qulakkeerinissaq suliassaqaarfimmilu naapertuuttumik aqutsinissaq eqqarsaatigalugit pisariaqartutut nalilerneqarpoq.

3. Pisortanut aningaasaqarnikkut allaffissornikkullu sunniutissat

3.1. Pisortanut aningaasaqarnikkut sunniutissat

Siunnersuutip naammssinissaa imminermi Nunatta Karsianut aningaasaqarnikkut sunniuteqartussat naliliiffigineqanngilaq. Akitsuutinik akiliuteqartitsisalerneq Nunatta Karsianut isertitsissutaassaaq, aaqqissuussinerup aqunneqarneranut atorineqartussanik.

Siunnersuummi matumani Naalackersuisunut piginnaatitsissutissat nalunaarutigineqartut namminermi aningaasaqarnikkut sunniuteqartussat naatsorsuutigineqanngillat.

3.2. Pisortanut allaffissornikkut sunniutissat

Allaffissorneq eqqarsaatigalugu peqqussutissat siunnersuut allaffissornerup annertusineratigut Naalackersuisunut artukkisussaannngilaq. Naalackersuisut aaqqissuussinermik aqutsisussaammata siunnersuut kommunit allaffissornerulernerannik kinguneqassanngilaq. Kisiannili naatsorsuutigineqartariaqarpoq maleruagassani peqqussut naapertorlugu aalajangersarneqartuni isumannaallisaanermut maleruagassanik sukannernerusunik aalajangersaasoqartarnissaa, taakkulu atuutilernerisigut kommunit soorlu najukkani pilersaarutini assigisaannilu qaartartuusivinnik sanaartorfissanut nutaanut innersuussisariaqartalissapput.

4. Inuussutissarsiornermut aningaasaqarnikkut allaffissornikkullu sunniutissat

Peqqussutissat siunnersuutip atuutilerneratigut akoorussanik qaartuujasunik pisinissamik atuinissamillu akuersissummik pissarsinissamik, qaartiterisartunut pisortatut akuerineqarnissamik imaluunniit qaartartunik toqqorsivissamut akuerineqarnissamik kissaateqartut akiliuteqartinneqartalissapput.

Kisiannili siunnersuut inuussutissarsiornermi allaffissornerup annertusineqarneranik kinguneqassanngilaq.

5. Pinngortitamut avatangiisinullu sunniutissat

Peqqussutissat siunnersuutip avatangiisinut pinngortitamullu annertunerusunik sunniuteqarnissaa naatsorsuutigineqanngilaq.

6. Innuttaasunut allaffissornikkut kingunerisassat

Peqqussutissatut siunnersuutip nassatarisaanik pisut ilaanni siumoortumik eqqartuussisumit akuersissummik piniaqqaarani uppersaatissanik ujaasisoqarsinnaalissaaq. Aalajangersagaq isumannaatsuutitsinissaq kiisalu nalinginnaasumik toqqissisimanissaq eqqarsaatigalugit ilan-ngunneqarpoq.

7. Sunniutissaasinnaasut annertuut allat

Peqqussutissatut siunnersuutip atuutilerneratigut akoorutissat qaartuujasut ikuallajasullu pillugit suliaasaqarfimmi isumannaassutsip annertuumik qaffanneqarnissaa naatsorsuutigineqarpoq.

8. Naalagaaffeqatigiinnermut namminersulernissamullu tunngasut

Peqqussutissatut siunnersuutip namminersulernissamut tunngatillugu sulianut sunniuteqarnissaa naatsorsuutigineqanngilaq.

9. Oqartussaasunut kattuffinnullu il.il. tusarniaaneq

Peqqussutissatut siunnersuutip allaqqaarnera Kalaallit Nunaanni Politimesterimut, Kalaallit Nunaanni Rigsombudsmandimut, Sulisitsisut Peqatigiiffiannut aamma KANUKOKA-mut tusarniaassutigineqarpoq. Tusarniaaffigineqartut akissuteqarnissamut sapaatit akunnerinik sisamanik piffissaqartinneqarsimapput.

Kalaallit Nunaanni Politimesterip tusarniaanermut akissutaa imatut allannguinnissamut tun-ngavissiihimavoq:

1) Eqqartuussisumit aalajangiinermik piniaqqaarani uppersaatissanik ujaasisarnermut inatsisitigut tunngavissaq misissuiartorsinnaatitaanermut allanngortinneqarpoq, taamatullu tamatumunnga inatsisitigut tunngavissaq peqqussutissarpiaamut ilanngunneqarpoq, Naalakkersuisut tamatumunnga maleruagassiornissamut piginnaatinneqarnissaannut taarsiullugu. Taamaattorli Naalakkersuisut eqqartuussisumit aalajangiinermik piniaqqaaratik inunnut suliffeqarfinnullu il.il. maleruagassanik inatsisartut peqqussutaanni aalajangersarneqarsimasunik unioqqutitsisosimasorineqartunut (taamaallaat) misissuiartorsinnaatitaanerat aalajangiusimaneqassasoq qinerneqarpoq.

2) Peqqussummik taannalu tunngavigalugu maleruagassanik aalajangersarneqartunik unioqqutitsinermi pineqaatissiissutaasinnaasut Kalaallit Nunaanni pineqaatissiissutaasinnaasunut atuuttunut naleqquttunngorlugit aaqinneqarput.

Kalaallit Nunaanni Rigsombudsmandip tusarniaanermut akissutaa imatut allannguinnissamut tunngavissiihimavoq:

1) Peqqussummik taannalu tunngavigalugu maleruagassanik aalajangersarneqartunik unioqqutitsinermi pineqaatissiissutaasinnaasut Kalaallit Nunaanni pineqaatissiissutaasinnaasunut atuuttunut naleqquttunngorlugit aaqinneqarput.

Tusarniaanermi akissut eqqartuussisumit aalajangiinermik piniaqqaarani uppersaatissanik ujaasinerup eqqartuussivimmut nalunaaruteqarnermik

malitseqartinnissaannut tunngaviliin-ngilaq, aalajangersagaq taanna misissuisinnaatitaanermut allanngortinneqarmat.

Kiisalu tusarniaanermi akissut akitsuutiniq akiliisitsisarnissaq pillugu aalajangersakkap allanngortinnissaanut tunngaviliinngilaq. Siunnersuutigineqarpoq Naalakkersuisut akitsuutip annertussusissaanik aalajangersaasinnaanissaannut inatsitigut tunngavissamik aalajangersaasoqassasoq. § 25 c, imm. 1-imut oqaaseqaatini taaneqartut tunngavigalugit akitsuutiniq akiliisitsisarnissamut inatsitigut tunngavissaq peqqussutikkut aalajangersarneqarpoq.

Sulisitsisut Peqatigiiffianniit tusarniaanermi akissummi Naalakkersuisut taamak annertutigisumik maleruagasiornissamut piginnaatinneqarnerat isornartorsiorneqarpoq, tamatuma ki-ngorna Naalakkersuisut katitigaanerat aaqqissuussinerup qanoq iliorluni aqunneqarnissaanut aalajangiisussanngortussaammat.

Oqaaseqaatini nalinginnaasuni allanneqartut inatsisip sapinngisamik eqaatsuutinnissaa, taamaalilluni ilaatigut Kalaallit Nunaanni ajortumeerisoqarpat allatulluunniit inuiaqatigiinni isumannaassutsimut ulorianartorsiorititsisoqarpat piffissap sivikitsup ingerlanerani unitsitsisoqarsinnaanissaa pitsaaliuisoqarsinnaanissaaluunniit, taamatullu Naalakkersuisut maleruagassanik ataatsimoortunik imminnullu atasunik, inuit ulluinnarni akooorutissanik qaartuujasunik avatangiiseqartut isumannaassusaat ataatsimut isigalugu pilersitsisinnaanissaat pingaernerutinneqarpoq.

Kiisalu Sulisitsisut Peqatigiiffianniit tusarniaanermi akissuteqaammi akuersissusiornermut akuersissuteqarnermullu aammalu taakkuninnga nutarterinermut atatillugu akitsuutiniq akiliuteqartitsisinnaalernissamut tunngavissiisoqarnera isornartorsiorneqarpoq, tamanna Kalaallit Nunaanni sanaartornermut akitsorsaataassammat.

Sanaartornermut atatillugu qaartiterinermut aningaasartuutit sanaartornermut tamakkiisumut aningaasartuutitut naleqqiullutik annikitsuaraannaasarmata, akitsuusiineq peqqutigalugu sanaartorerup akitsorsarneqarnissaanik isuma isumaqataaffigineqanngilaq.

KANUKOKA tusarniaanermi akissuteqanngilaq.

Peqqussutissatut siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut

Kapitali 6-ip qulequtaata allanngortinneqarneranut kapitalip imaasa allanngortinneqarneri peqqutaavoq.

Nr. 2- mut

§ 25, imm. 1-imut

Aalajangersakkap atuutilerнатигut pineqartup iluani Naalakkersuisut maleruagassiorfigisinnaasaat maannamut inatsisitigut inissisimanermut naleqqiullugu annertuumik annertusineqartussaapput. Naalakkersuisut maannakkut oqartussaaffigisamik saniatigut akoorutissanik qaartuujasunik eqqussinissamut, annissinissamut, tuniniaanissamut, pisinissamut sananissamullu maleruagassiorsinnaalerput. Eqqussinissamut annissinissamullu tunngatillugu aamma assersuutigalugu eqqussinissamut annissinissamullu inerteqquteqarnermut maleruagassiorsinnaatitaaneq ilanngunneqarpoq.

Oqaasertaanut tunngatillugu oqaaseq "atuineq" aalajangersakkat siornatigut atorнеqartut qallunaatoortaanni allanngortinneqarpoq. Tassani inatsisitigut inissisimanermut siornatigut atugaasumut naleqqiullugu najoqqutassatigut allannguisoqarnissaa eqqarsaatigineqanngilaq.

§ 25, imm. 2-mut

Tassani Naalakkersuisut assersuutigalugu suliffeqarfinni assigiinngitsuni ingerlatsineq, taakku suliaat toqqortaallu, kiisalu sanaartornerat pillugu maleruagassiorsinnaanermut piginnaatinneqarnerat pineqarpoq.

Suliassanut taamaattunut maleruagassiorsinnaanermut piginnaatitsineq allami, soorlu illuliornermi malittarisassani nassaassaqaanngilaq. Taamaattumik imminut illersorsinnaasumik aqutsinissaq eqqarsaatigalugu piginnaatitsissutip peqqussummi matumani pigiinnarnissaa pisariaqarsimavoq. Tassani inatsisitigut inissisimanermut siornatigut atugaasumut naleqqiullugu najoqqutassatigut allannguisoqarnissaa eqqarsaatigineqanngilaq.

§ 25, imm. 3-mut

Aalajangersakkap imaa § 25, imm. 1-ip maannamut atuuttup ilaata assigaa, tassanili maleruagassat ataatsimoortillugit allanneqarput oqaaseqatigiillu allanngortinneqarlutik. Tassani Naalakkersuisut assersuutigalugu ikuallannaveersaartitsinerми pujoorfinnut aamma qatserutaasinnaasunut annanniutaasinnaasunullu tunngatillugu maleruagasiornissamut piginnaatinneqarnerat pineqarpoq. Tassani inatsisitigut inissisimanermut siornatigut atugaasumut naleqqiullugu najoqqutassatigut allannguisoqarnissaa eqqarsaatigineqanngilaq.

§ 25, imm. 4-mut

Aalajangersagaq § 25, imm. 1-imi aalajangersakkat atuuttuusimasut ilaannik uteqqiineruvoq, taamaattumillu inatsisitigut inissisimanermut siornatigut atugaasumut naleqqiullugu najoqqutassatigut allannguisoqarnissaa eqqarsaatigineqanngilaq.

Aalajangersakkakut Naalackersuisut akoorutissat aalaakkaasut, imerpalasut silaannartullu pissusillit ikuallajasut pillugit maleruagassiornissamut piginnaatinneqarput. Tamatumani assersuutigalugu ivikkat, ivigarsuit, orsuutit, nipinnequt, imerpalasut gassillu eqqarsaatigineqarput.

Nr. 3-mut

§ 25 a, imm. 1-imut

Aalajangersakkap atuutilerneratigut isumannaallisaaneq eqqarsatigalugu suliaasaqarfinni taakkartorneqartuni ataasiinnarmik sullissisoqarnissaq Naalackersuisut aalajangersinnaalissavaat. Aamma aalajangersakkap oqaasertaliorneratigut suliaasaqarfiit taakkartorneqartut tamarmik immikkut ataasiinnarmik sullissisoqarsinnaanerit periarfissinneqarpoq, taamaalilluni assersuutigalugu ataaseq akoorutissanik qaartuujasunik eqqussinissamut kisermaassisussan-ngortinneqarsinnaalluni, allalu akoorutissanik qaartuujasunik tuniniaanissamut kisermaassisussanngortinneqarsinnaalluni. Kiisalu sullissisoq ataasiinnaq aamma suliaasaqarfinnut taakkartorneqartunut tamanut kisermaassisunngortinneqarsinnaavoq. Ilaatigut inuup suliffeqarfiulluunniit suliaasanut annertuunik ilisimasaqartup kisermaassisussanngortinneqarsinnaalerneratigut ataatsimut isigalugu isumannaassuseq aalajangersakkakut annertusiniarneqarpoq, taamatullu suliaasaqarfimmi aqutsineq eqaannerulersinniarneqarluni, taamaalilluni suliaqartuni akuusut amerlassutsimikkut ikilissinneqarsinnaammata. Akuersissummik nalunaaruteqarnermi suliaasat arlallit tamanut ammasumik suliariumannittussarsiuunneqartalernissaat eqqarsaatigineqarsinnaavoq, tamatuma pineratigut ajugaasoq assersuutigalugu Kalaallit Nunaat tamakkerlugu akoorutissanik qaartuujasunik ikuallajasunilluunniit pilersuinissamut pisinnaatitaaffilerneqassammat pisussaaffilerneqassallunilu.

Aamma akuersissummik nalunaaruteqarneq suliariumannittussarsiuussinerup saniatigut periaatsimik allamik atuinnikkut pisinnaavoq, soorlu toqqartuinikkut.

§ 25 a, imm. 2-mut

Aalajangersakkami naalackersuisut imm. 1 naapertorlugu nalunaaruteqarnermut atatillugu atugassarititaasussanik aalajangersaanissamut pisinnaatinneqarput. Atugassarititaasussat piffissamut killiliinernut imaluunniit nunami sumiinnermut killiliinermut tunngasinnaapput.

§ 25 b-mut

Aalajangersagaq nutaajuvoq, aammallu Naalackersuisut maleruagassanik peqqussut naapertorlugu suliarineqartunik unioqqutitsisuorisamut misissuiartorsinnaanerinit inatsisitigut tunngaviliilluni. Aalajangersagaq oqaasertaliorneqarnermigut misissuisarnermut tamarmiusumut aalajangersakkatut ilusilerneqarpoq, tassanilu unioqqutitsisoqarneranik pasitsaassisimanissaq piumasarineqarpoq. Tamatuma saniatigut Naalackersuisut suliaasaqarfiup isumannaatsumik aqunneqarnissaa eqqarsaatigalugu misissuinissap ingerlanneqarnerata pisariaqarneranik naliliisimanissaat piumasarineqarpoq. Pisariaqartitsinermi naliliisarneq aamma siumoortumik eqqartuussisumit aalajangiiffiunngitsumik misissuisarnerpamut

tungasuvoq. Aatsaat siumoortumik eqqartuussisumit aalajangiisitsiniaqqaarnermi misissuinermi siunertaasoq tamaangaannarsinnaappat, siumoortumik eqqartuussisumit aalajangiiffiunngitsumik misissuineq pisinnaavoq.

Aalajangersakkami erseqqissarneqarpoq misissuinermi oqartussaasut arlaat sinnerlugu atorfilik takkuttoq ornigunnersoq, kiisalu takkuttup kinaaneramik uppernarsaammik takutitsisoqartarnissaa. Uppernarsaat peqquneqanngikkaluarluni takutinneqassaaq.

Maleruagassanik peqqussut naapertorlugu aalajangersarneqartunik unioqqutitsisuosorineqartoq misissuiffigineqarsinnaavoq. Sumiiffiit ornillugit misissuiffigineqarsinnaasut soorpiarneri erseqqissassallugit ajornakusoorpoq, kisiannili oqaasertaliornera atituumik atuuttutut paasineqassaaq. Taamaattumik misissuinissaq soorlu inini, qaartartuusivinni assartuutinilu, akoorutissat qaartuujasut ikuallajasullu toqqortarineqarfiini imaluunniit atorneqarfiini pisinnaavoq.

Aalajangersakkami erseqqissarneqarpoq piginnittup taassumaluunniit sulisuisa Naalackersuisut misissuinermi pisariaqartitaannik siunnersussallugit ikiussallugillu pisussaaffigigaa. Taamaattorli ilitersuinissamik ikiuunnissamillu pisussaaffiup taassuma annertussusaata pissusiatalu pissutsit Europami Inuit Pisinnaatitaaffii pillugit isumaqatigiissutip (Den Europæiske Menneskerettighedskonvention) imminut pinerluttuunerarnissamik inerteqquteqarneranut akerliutilissanngilai.

Pisartuni qaqutigooortuni inini nammineq angerlarsimaffittut imaluunniit sunngiffimmi angerlarsimaffittut atorneqartuni misissuinissaq pisariaqartutut naliliiffigineqarpat, tamanna Kalaallit Nunaanni eqqartuussisarnermik inatsimmi kapitali 5-imi uppernarsaatissanik ujaasisarnermut maleruagassat naapertorlugit pissaaq. Tamatuma peqatigisaanik politiit Kalaallit Nunaanni eqqartuussisarnermik inatsit naapertorlugu pinerluuteqartoqarnerani paasiniaanermut atatillugu ininut il.il. isersinnaatitaapput.

§ 25 c-mut

Tassani akorutissanik qaartuujasunik pisinissamut atuinissamullu akuersissusiordermut taakkuninngalu nutarterinermut, qaartiterisartunut pisortatut akuersissusiordermut taakkuninngalu nutarterinermut kiisalu qaartartuusivinnik akuersissusiordermut atatillugu akiliuteqartitsisarnissaq aalajangerneqarpoq.

Akiliutissaq Inatsisartut aningaasanut inatsisaanni oqaasertaliussinikkut aalajangersarneqassaaq. Taamaattorli siunertaanngilaq akiliutissaq missiliuinikkut misilittakkallu naapertorlugit suliassaqarfimmi allaffissornermut aningaasartuutaasartunit annertuumik qaffasinnerussasoq, ilanngullugit misissuisarnermut nakkutilliinermullu suliat, sullissinermut akiliummut akiliutigineqartumut pissusissamisoortumik attuumassuteqartut.

§ 25 d-mut

Aalajangersakkami § 25 naapertorlugu Naalackersuisut maleruagassiornerminni

Naalackersuisut akuersissummik akuerisamilluunniit nalunaarutigisaanik utertitsinnaanermut aalaja-ngersaasinnaanerat inatsisitigut tunngavissinneqarpoq. Tassani akuersissummik imaluunniit akuerisamik nalunaaruteqarnissamut tunngavissat atorunnaarsimanissaat eqqarsaatigineqarpoq.

Matumani allaffissornikkut aalajangersagaq, Kalaallit Nunaanni pinerluttulerinermut inatsimmi pineqaatissiissutissatut taaneqartunut peqatigitillugu atorneqarsinnaasoq pineqarpoq. Allaffissornikkut utertitsineq inuinnarnut taamatullu inatsisitigut pisinnaatitaasunut pisussaataasunullu, Namminersornerullutik Oqartussanut, kommunitumut imaluunniit kommunit suleqatigiiffiannut atorneqartassaaq.

-

Nr. 4-mut

§ 26, imm. 2-mut

Aalajangersakkap atuutilerneratigut pineqaatissiissutaasinnaasut maannamut inatsisitigut i-ngerlatitsinnaanernut atuuttunut naleqqiullugu annertusineqassapput, tamannalu ataatsimut isigalugu akoorutissanik qaartuujasunik atuisut akoorutissanik qaartuujasunik atuinermi mianerinninnerulernissaasa kajumissaarneqarnissaannik kissaateqarnermik tunngaveqarpoq. Tamanna pinngippat sakkortuumik pineqaatissiisoqarsinnaavoq. Taamatuttaaq arlaatigulluunniit ajortumeeriniarneq paasineqarpat pineqaatissiissutissat sakkortuut atorneqarnissaat naatsorsuutigineqarpoq.

Oqaasertaliornermi siunertarineqarpoq pineqaatissiissutissat Kalaallit Nunaanni pinerluttulerinermut inatsimmiittut tamarmik atorneqarsinnaanissaat, tamatumani unioqquitsinerup annertussusaa apeqqutaatinneqassalluni. Tassalu inuinnarnut tunngatillugu akiliisussanngortitsisarnissaq, pinerluuteqarsimasunik inissiisarfimmut inissiisarnissaq kiisalu pisinnaatitaaffiaannissaq immikkut eqqarsaatigineqarput.

Akiligassap annertussusaa inatsisinik unioqquitsinerup ulorianaateqarsimaneranut, kiisalu maleruagassanut pineqartunut unioqquitsinerup aningaasatigut iluaqutissarsiffigineqarsinnaasimaneranut naleqqiullugu aalajangersarneqassaaq. Akiligassap annertussusaata ataatsimut isigalugu qaffasissuunnissaa naatsorsuutigineqarpoq.

Pineqaatissiissutaasinnaasut assigiinngitsut, pissusilersornissamut annertuumik sunniuteqartussatut naatsorsuutigineqartut saqqummiussuunneqarput, tassanilu assersuutigalugu sulisitsisut suliffeqarfiutiminni akoorutissanik qaartuujasunik atuinermik pinngitsuisinnaanngitsut innersuunneqarput. Saqqummiunneqartuni aappaatigut assersuutigalugu pisiniarnissamut atuinissamulluunniit piffissami sivikitsumi atueqqusaajunnaarsitsisoqarsinnaavoq, aappatigullu akoorutissanut qaartuujasunut tamanut tunngatillugu atuisinnaatitaaneq annaaneqavissinnaalluni. Kiisalu naatsorsuutigineqarpoq akoorutissanik qaartuujasunik atuisinnaatitaanermik aarsaarinnineq kisimiitillugu atorneqartarnissaa, kisiannili aamma Kalaallit Nunaanni pinerluttulerinermut inatsimmi pineqaatissiissutaasunut allanut ilanngullugu atorneqarsinnaassalluni.

§ 26, imm. 3-mut

Inatsisitigut pisinnaatitaasunut pisussaatitaasunullu, Namminersornerullutik Oqartussanut, kommunimut imaluunniit kommunit suleqatigiiffianut tunngatillugu aalajangersakkami erseqqissarneqarpoq inatsisitigut pisinnaatitaasut pisussaatitaasullu taakku ilaalu ilanngullugit imm. 1-imik 2-millu unioqqutitsineranni akiliisussanngortitsisoqarsinnaasoq, inatsisit allat naapertorlugit iliuusissatut ingerlaqqiffissat atorneqarsinnaasimanngippata.

nr. 5-imut

§ 26, imm. 4-tut atuuttuusimasoq § 26, imm. 3-tut ilanngunneqarpoq. Taamaattumik aalaja-ngersagaq atorunnaarsinneqarpoq.

§ 2-mut

Pequssut 1. januar 2007 aallarnerfigalugu atuutilerpoq.